



PATNUBAY SA MISA



15 Enero 2023 Kapistahan ng Panginoong Hesus, ang Banal na Sanggol Taon A

Ibigin si Hesus sa ating mga Kabataan

Ipinagdiriwang natin ngayon ang Kapistahan ng Sto. Niño na totoong malapit sa puso ng maraming Katolikong Pilipino. Ang ganitong tau-nang pagdiriwang ay nagsimula noong bagu-bago pa lamang naging Kristiyano ang ating bansa, at patuloy pa ring may kaangkupan ito sa buhay natin ngayon. Sa isang natatanging paraan, pinagtutuunan natin ng pansin ang kabataan, ang lahat ng mga panganib na nagbabanta sa kanila, ang kanilang mga problema, at ang pag-asang dulot nila.

Ang araw na ito, at lalung-lalo na ang pagdiriwang natin ng Eukaristiya, ay magandang pagkakataon para ihabilin ang ating kabataan sa kalinga ng Sto. Niño at mahal in ang mga ito tulad ng pagmamahal niya. Palibhasa bahagi siya ng ating kasaysayan at buhay, tiyak na iingat niya sila at tuturuan din niya tayo ng wastong paggabay sa kanila.



PASIMULA



Pambungad

(Ipahayag lamang kung walang awiting nakahanda.)

Batang sa ati'y sumilang ay anak na ibinigay upang magharing lubusan, taglay ang dakilang ngalang Tagapayo ng Maykapal.

Pagbati

P–Pagpalain si Hesus na nagpakita ng natatanging pagmamahal sa kabataan. Ang kanyang biyaya at kapayapaan ay sumainyong lahat!
B– **At sumaiyo rin!**

Pagsisisi

P–Natitipon bilang mag-anak ng Diyos ngayong Kapistahan ng Sto. Niño, tayo'y humiling sa Diyos ng Kanyang pagpapatawad upang maihandog natin ang Eukaristiyang ito nang may malinis na kalooban. (Manahimik sandali.)

P–Panginoong Hesus, ang Kaharian mo ay panlahat at tuwinang payapa. Panginoon, kaawaan mo kami!

B–**Panginoon, kaawaan mo kami!**

P–Panginoong Hesus, naparito ka upang makibahagi sa kahinaan ng aming pagkatao. Kristo, kaawaan mo kami!

B–**Kristo, kaawaan mo kami!**

P–Panginoong Hesus, nais mong palapitin sa iyo ang kabataan. Panginoon, kaawaan mo kami!

B–**Panginoon, kaawaan mo kami!**

P–Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B–**Amen!**

Papuri

B–Papuri sa Diyos sa kaitaasan at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin,

sinasamba ka namin, ipinagbunyi ka namin, pinasasalamat ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P–Ama naming makapangyarihan, ang iyong Anak na Diyos na totoo ay naging sanggol noong

This issue of *Patnubay sa Misa* may be downloaded for free anywhere in the world. A "love offering" for the continuation of our apostolate will be appreciated. Please, send your donation to "Word & Life Publications." Our Savings Account is BPI – # 3711-0028-46. Send us a copy of the deposit slip with your name and (email) address for proper acknowledgment. See contact details on the last page. Thank You!

siya ay maging tao namang totoo. Maging amin nawang panata ang pagsunod sa kanyang kapakumbabaan sa pagdiriwang namin sa kanyang pakikiisa sa mga nasa abang katayuan upang kami'y mapabilang sa iyong pinaghaharian sa pamamagitan niya kasama ng Espiritu Santo magpasawalang hanggan.

B – Amen!

PAGPAPAHAYAG NG SALITA NG DIYOS



Unang Pagbasa *Isa 9:1-6*

Ang maririnig nating pagpapahayag ay isang propesiya tungkol sa isang mahiwagang bata – ang Mesiyas na naghatid ng liwanag ng pag-ibig ng Diyos sa mundong pinagdilig ng pagkakasala.

L – Pagpapahayag mula sa Aklat ni Propeta Isaias

Nakatanaw ng isang malaking liwanag ang bayang malaon nang nasa kadiliman, namanaag na ang liwanag sa mga taong namumuhay sa lupaing balot ng dilim. Iyong pinasigla ang kanilang pagdiriwang, dinagdagan mo ang kanilang tuwa. Tulad ng mga tao sa panahon ng anihan, tulad ng mga taong naghahati ng nasamsam na kayamanan. Nilupig mo ang bansang umalipin sa iyong bayan tulad ng pagkalupig sa hukbo ng Madian. Binali mo ang panghambalos ng mga tagapagpahirap sa kanila. Sapagkat ang panyapak ng mga mandirigma, ang lahat ng kasuutang tigmak sa dugo ay susunugin. Sapagkat ipinanganak para sa atin ang isang sanggol na lalaki. Ibinigay ang isang anak sa atin at siya ang mamamahala sa atin. Siya ang Kahanga-hangang Tagapayo, ang Makapangyarihang Diyos, Walang hanggang Ama, ang Prinsipe ng Kapayapaan. Malawak na kapangyarihan at walang hanggang kapayapaan ang ipagkakaloob sa trono ni David at sa kanyang paghahari upang matatag ito at papanatilihin sa katarungan at katwiran ngayon at magpakailanman. Isasagawa ito ng Makapangyarihang Panginoon.

Ang Salita ng Diyos!

B – Salamat sa Diyos!

Salmong Tugunan *Awit 98*

B – *Kahit saa'y namamalas, tagumpay ng Nagliligtas!*

R. M. Velez

Ka-hit sa-a'y na-ma-ma-las, ta-gumpay ng Nag-li-lig-tas!

* Umawit ng bagong awit at sa Poon ay ialay, pagka't yaong ginawa n'ya ay kahanga-hangang tunay! Sa sariling lakas niya at taglay na kabanalan, walang hirap na natamo yaong hangad na tagumpay. **B.**

* Ang tagumpay niyang ito'y siya na rin ang naghayag, sa harap ng mga bansa'y nahayag ang pagliligtas. Ang pangako sa Israel lubos niyang tinutupad. **B.**

* Tapat siya sa kanila at ang pag-ibig ay wagas. Ang tagumpay ng ating Diyos kahit saan ay namalas! Magkaingay na may galak, yaong lahat sa daigdig; ang Poon ay buong galak na purihin sa pag-awit! **B.**

* Sa saliw ng mga lira iparinig yaong tugtog, at ang Poon ay purihin ng tugtuging maalindog. Tugtugin din ang trompeta na kasaliw ang tambuli, magkaingay sa harapan ng Poon na ating hari. **B.**

Ikalawang Pagbasa *Ef 1:3-6*
15-18

Sa panalanging ito ng papuri at kahilingan, ipinahahayag ni Pablo ang ilan sa mga lalong kalugud-lugod na katotohanan ng ating pananampalataya.

L – Pagpapahayag mula sa Sulat ni Apostol San Pablo sa mga Taga-Efeso

Mga kapatid: Magpasalamat tayo sa Diyos at Ama ng ating Panginoong Hesukristo! Pinagkalooban niya tayo ng lahat ng pagpapalang espirituwal dahil sa ating pakikipag-isa kay Kristo. At sa atin ngang pakikipag-isa ng ito, hinirang na niya tayo bago pa nilikha ang sanlibutan upang maging banal at walang kapintasan sa harapan niya. Dahil sa pag-ibig ng Diyos, tayo'y kanyang itinalaga upang maging mga anak niya sa pamamagitan ni Hesukristo. Iyan ang kanyang layunin at kalooban. Purihin natin siya dahil sa kanyang kahanga-hangang pagkalinga sa atin sa pamamagitan ng kanyang minamahal na Anak!

Kaya nga, mula nang mabalitaan

ko ang tungkol sa inyong pananalig sa Panginoong Hesus at ang inyong pag-ibig sa lahat ng hinirang, walang humpay ang pasasalamat ko sa Diyos para sa inyo. Inaalaala ko kayo sa aking pananalangin, at hinihiling sa Diyos ng ating Panginoong Hesukristo, ang dakilang Ama, na pagkalooban niya kayo ng espiritu ng karunungan at ng tunay na pagkakilala sa kanya. Nawa'y liwanagan ng Diyos ang inyong mga isip upang malaman ninyo ang ating inaasahan sa kanyang pagkatawag sa atin. Ito'y ang kaluwalhatian ng inilaan niya sa kanyang mga hinirang.

Ang Salita ng Diyos!

B – Salamat sa Diyos!

Alaluya *Jn 1:14,12*

B – Alaluya! Alaluya!

Naging tao ang Salita, upang tanang maniwala ay kanyang gawing dakila.

Alaluya! Alaluya!

Mabuting Balita *Mt 18:1-5,10*

Mula sa tanong kung sino ang una sa Kaharian ng Diyos, sinamantala ni Hesus ang pagkakataon para ituro sa atin kung gaano niya pinahalalagan ang mga bata, at kung paano rin natin dapat silang pahalalagan at mahalina.

P – Ang Mabuting Balita ng Panginoon ayon kay San Mateo
B – Papuri sa iyo, Panginoon!

Noong panahong iyon, lumapit kay Hesus ang mga alagad at nagtanong, "Sino po ang pinakadakila sa kaharian ng langit?"

Tinawag ni Hesus ang isang bata, pinatayo sa harapan nila, at sinabi, "Tandaan ninyo ito: kapag hindi kayo nagbago at tumulad sa mga bata, hinding-hindi kayo mabibilang sa mga pinaghaharian ng Diyos. Ang sinumang nagpapakababa na gaya ng batang ito ay siyang pinakadakila sa mga pinaghaharian ng Diyos. Ang sinumang tumatanggap sa isang batang ganito dahil sa akin ay ako ang tinatanggap.

Ingatan ninyo na huwag hamakin ang isa sa maliliit na ito. Sinasabi ko sa inyo: sa langit, ang kanilang mga anghel ay laging nasa harapan ng aking Ama."

Ang Mabuting Balita ng Panginoon!

B – Pinupuri ka namin, Panginoong Hesukristo!

Homiliya

Sumasampalataya

B—Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tawang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P—Sa pagpaparangal natin ngayon sa Sto. Niño, pagtuunan natin ang ating kabataan at ipanalangin ang lahat ng kanilang pangangailangan:

B—Hesus, pakinggan mo kami!

* Nawa ang buong Simbahan, sa pamumuno ng Santo Papa, ating Obispo, at mga pari, ay magpamalas ng natatanging praktikal na pagkalinga sa ating kabataan. Manalangin tayo! **B.**

* Nawa lahat ng guro at ang *media* ay makatulong sa pagkikintal sa ating kabataan ng mga tunay na pagpapahalaga at makaganyak sa kanilang magsabuhay ng mga ito. Manalangin tayo! **B.**

* Nawa lumago ang ating kabataan sa katapatan at kalinisan sa kanilang pagsasabuhay ng pananampalatayang Katoliko. Manalangin tayo! **B.**

* Nawa alagaan ng lahat ng magulang ang kanilang mga anak, tulad ng pag-aalaga nina Maria at Jose kay Hesus at tulutan nawang mahubog nila

silang maging mabubuting mamamayan at mga masisigasig na kasapi ng Simbahan. Manalangin tayo! **B.**

* Nawa matiyagang palaguin ng lahat ng deboto ng Sto. Niño ang kanilang pag-ibig sa Diyos at sa kapwa. Manalangin tayo! **B.**

* Tahimik nating ipanalangin ang ating mga sariling kahilingan. (*Tumigil sandali.*)

Manalangin tayo! **B.**

P—Panginoon, tulutan mong pagmalasakitan namin ang kabataan ngayon at pagsikapan namin ang kanilang kapakanan alang-alang sa pag-ibig sa iyong nabubuhay at naghahari nang walang hanggan.

B—Amen!



P—Manalangin kayo. . .

B—Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P—Ama naming Lumikha, sa pagdiriwang namin sa kapistahan ng Banal na Sanggol, paunlakan mo ang aming pagdulog upang ganapin ang kanyang paghahain at ang kinamtan niyang kapatawaran ay pakinabangan namin sa pamamagitan niya kasama ng Espiritu Santo magpasawalang hanggan.

B—Amen!

Prepasyo

P—Sumainyo ang Panginoon!

B—At sumaiyo rin!

P—Itaas sa Diyos ang inyong puso at diwa!

B—Itinaas na namin sa Panginoon!

P—Pasalamat natin ang Panginoon at Diyos!

B—Marapat na siya ay pasalamat!

P—Ama naming makapangyarihan, tunay ngang marapat na ikaw ay aming pasalamat sa pamamagitan ni Hesukristo na aming Panginoon.

Ang Anak mong di na naiiba

sa amin ay siyang pumawi sa dilim kaya ngayo'y ikaw ang aming nababanaagan. Ang Anak mong di naiiba sa iyo ay siyang iisang Salita mo. Sa katauhan niya ang iyong sarili'y aming nakikita. Sa pamamagitan niya ang iyong pag-ibig ay kahali-halina kahit ikaw ay lingid sa aming mata.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B—Santo, santo, santo Panginoon Diyos ng mga hukbo. Napupuno ang langit at lupa ng kadakilaan mo. Osana sa kaitaasan!

Pinagpala ang naparirito sa ngalan ng Panginoon. Osana sa kaitaasan!

Pagbubunyi

B—Aming ipinahahayag na namatay ang 'yong Anak, nabuhay bilang Mesiyas at magbabalik sa wakas para mahayag sa lahat.



B—Ama namin. . .

P—Hinihiling namin. . .

B—Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B—Kordero ng Diyos na nag-aalis ng mga kasalanan ng sanlibutan, maawa ka sa amin. (2x)

Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.

Paanyaya sa Pakikinabang

P—Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging. **B**—Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang

(*Ipahahayag lamang kung walang awiting nakahanda.*)

Sa pag-uwi sa Nazaret, si Hesus

ay masigasig sa pagsunod at pag-ibig sa magulang n'yang matuwid, sina Maria at Jose.

Panalangin Pagkapakinabang

P—Ama naming mapagmahal, kaming pinapakinabang mo sa iyong piging na banal sa kapistahan ng iyong Anak na isinilang ng Mahal na Birhen ay makapamuhay nawa bilang iyong kasambahay na umuunlad sa karunungan at sa pagiging kalugud-lugod sa iyo at sa kapwa tao sa pamamagitan ni Hesuskristo kasama ng Espiritu Santo magpasawalang hanggan.

B—Amen!



P—Sumainyo ang Panginoon.

B—At sumaiyo rin!

P—Magsiyuko kayo at ipanalangin ang pagpapala ng Diyos. (*Manahimik sandali.*)

—Tulutan nawa ng Diyos na makilala ninyo ang kahalagahan ng kabataan para sa buhay ng Simbahan at ng lipunan.

B—Amen!

P—Gawin nawa kayo ng Diyos na mga itinatanging kasangkapan sa pagtataguyod ng

kapakanan at pag-unlad ng kabataan ng ating bayan.

B—Amen!

P—Gantimpalaan nawa ng buhay na walang hanggan ang inyong mga pagsisikap sa pagbibigay ng mabuting halimbawa sa kabataan.

B—Amen!

P—Pagpalain kayo ng makapangyarihang Diyos: Ama at Anak at Espiritu Santo.

B—Amen!

P—Humayo kayo sa kapayapaan upang mahalín at paglingkuran ang Panginoon.

B—Salamat sa Diyos!

Pagkatutong Magmahal sa Kabataan Katulad ng Pagmamahal ni Hesus sa Kanila

Lahat ng bata'y kaibig-ibig, di lamang ang mga sanggol o ang mga nakatutuwa, malulusog, at matatalino. Sa kanilang mga matang nagniningning sa pagtataka at kawalang malay ay may di mapigilang katuwaang nakapupukaw sa bawat normal na tao (at maging sa mga hayop) ng pagkagiliw at pag-iingat. Bawat bata ay tagapagpaalaala ng daigdig ng kawalang malay, mga pangarap, at mga pag-asang nakakaligtaan ng marami sa nakatatanda sa kanila.

Lahat ng bata'y nangangailangang mahalín, ngunit di lahat ay minamahal. Marami ang di minamahal nang tama. May ilang pinag-uukulan ng labis-labis na kalinga hanggang sila'y lumaki sa layaw na malamang maging mga palalo sa hinaharap. Ang iba nama'y walang gaanong tinatanggap na kalinga – kulang sa kailangan nila para sa kanilang paglagong pisikal, intelektuwal, sikolohiko, at emosyunal. Umiikli ang kanilang buhay, at sa mga mukha nila'y mababakas ang kapabayaan, kahirapan, at ang di namamalayang damdaming di sila minahal nang marapat . . .

May iba ring batang "ginagamit" lamang ng mga pabaya't masasamang nakatatanda. Nasisira sila ng kalupitan ng mga taong nag-aalay sa kanila sa mga diyos ng kasakiman at mga ganid sa kasiyahan sa laman.

At mayroon pa ring ibang – parami nang parami – **di man lamang pasilayan ng sikat**

ng araw at kinikitlan ng buhay sa sinapupunan pa man ng kanilang mga ina, mga biktima ng di masupil na pagkaganid, kahihyan, kapalaluan, at kasakiman . . .

Saksi tayo sa ganitong mga pangyayari araw-araw sa kung ilan nang dekada, dito man sa Pilipinas, na bayan ng magagandang bata, bayan ng Santo Niño!

Di natin maipahayag ang malaking takot at pagkasuklam na ibinubunga ng **gutom, pang-aabuso sa kabataan, prostitusyon ng kabataan, at aborsiyon** . . . sa Diyos at lalo na sa atin! **May sa-demonyo ang lahat ng gayong mga anyo ng paghamak sa tao.**

Ipinakita ni Hesus ang kanyang pagmamahal sa mga bata ng kanyang panahon. (*Sangguniin ang sipi ng Ebanghelyo para ngayon.*) Sa ningning ng kanilang mga mata, nakita niya ang kagandahan at kabanalan ng Kaharian. Umaasa siyang ipakita natin ang gayon ding matibay na pagmamahal sa mga bata ng ating panahon.

Ang debosyon natin sa Banal na Sanggol ay di dapat na maging hanggang paggalang sa kanyang kaanyuan lamang. Dapat tayong akayin nito tungo sa praktikal na malasakit sa milyun-milyong mga bata sa buong mundo. Sila ang walang kalaban-labang mga biktima ng kawalan ng malasakit at kasakiman ng maraming taong kahihyan sa ating bayan at sangkatauhan.



WORD & LIFE
PUBLICATIONS

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 8894-5401; 8894-5241; 8475-8945 • Website: www.wordandlife.org

• E-mail: wordandlifepublications@gmail.com • FB: Word & Life Publications

• Editorial Team: Fr. S. Putzu, C. Valmonte, Fr. B. Nolasco, V. David, R. Molomog, M. Vibiesca, D. Daguio

• Illustrations: A. Sarmiento, B. Cleofe • Circulation: R. Saldua